



XALQ DEPUTATLARI BULUNG'UR TUMAN KENGASHINING Q A R O R I

25 - fevral 2021-yil

147/25 -son

O'zbekiston "Milliy tiklanish" demokratik partiyasi deputatlik guruhi tashabbusi bilan Bulung'ur tumani "Bog'bon" MFY hududidagi "G'o'bdin" tog'i "Yetimsoy" darasidagi qadimiy qoyatosh suratlari joylashgan hududni muhofazaga olish va moddiy madaniy meros obyektlari ro'yxatiga kiritish to'g'risida

O'zbekiston Markaziy Osiyoning moddiy madaniy va arxeologiya obyektlariga eng boy bo'lgan mintaqalaridan biridir. Bu hududda joylashgan minglab turli-tuman obidalar va arxeologik yodgorliklar mavjudligi juda qadimdanoq yuksak madaniyat shakllanganligidan dalolat beradi va bu yodgorliklar xalqimizning bebaxo milliy boyligi hisoblanadi. Shu sababli moddiy madaniy va arxeologiya merosi, uni muhofaza qilish, asrash, o'rganish va undan samarali foydalanish keyingi yillarda mamlakatimizda davlat siyosati darajasiga ko'tarildi.

Xususan, O'zbekiston Respublikasining "Madaniy meros obyektlarini muhofaza qilish va ulardan foydalanish to'g'risida"gi hamda "Arxeologiya merosi obyektlarini muhofaza qilish va ulardan foydalanish to'g'risida"gi qonunlari qabul qilindi, umumjahon madaniy va tabiiy merosni muhofaza qilish to'g'risida Konvensiya ratifikatsiya qilindi. Shuningdek, 2018-yil 16-fevralda "Moddiy madaniy va arxeologiya merosi obyektlarini muhofaza qilish va ulardan foydalanishni takomillashtirish to'g'risida" O'zbekiston Respublikasi Prezidentining farmoyishi chiqarildi.

O'zbekiston Respublikasi Vazirlar Mahkamasining 2019-yil 4-oktabrdagi 846-sonli qarori bilan Bulung'ur tumanida 25 ta moddiy madaniy meros ob'ektlari ro'yxatga olingan:

Shundan, 19 tasi (76 %) ni arxeologiya yodgorliklari, 6 tasi (24,%) ni arxitektura yodgorliklari.

Barchamizga ma'lum 2021-yil 16-fevral kuni Respublikamizda faoliyat yuritib kelayotgan ommaviy axborot vositalaridan biri Kun.uz rasmiy veb saytida "Bulung'urda neolit davriga oid qoyatosh suratlari qurilish uchun ishlatilmoqda" sarlavxasi ostida tanqidiy maqola e'lon qilindi.

O'zbekiston "Milliy tiklanish" demokratik partiyasi Samarqand viloyati Kengashi tashabbusi bilan 2021-yil 18-fevral kuni O'zMTDP Bulung'ur tuman Kengashi deputatlik guruhi, O'zR FA Milliy arxeologiya markazi Samarqand arxeologiya

instituti, Samarqand viloyat madaniy meros boshqarmasi hamkorligida Bulung'ur tuman "Bog'bon" MFY hududidagi "G'o'bdin" tog'i "Yetimsoy" darasini o'rganish ishlari amalga oshirildi.

O'rganish natijasida ma'lum bo'ldiki ushbu hududda topilgan qadimiy suratlar haqiqatdan ham ilmiy ahamiyat kasb etishi maqolada aytilganidek neolit darvi emas balki so'ngi bronza, ilk temir hamda so'nggi o'rta asrlargacha bo'lgan davrlarga oid ekanligi aniqlandi.

Ushbu madaniy qiymatga ega tumanimiz hududida topilgan qadimiy toshlar bizning zaminimizda ham qadimiy odamlar yashab hayot kechirganligi, asosan tog' hududlarida chorvachilik bilan shug'ulanganni, Bulung'ur tumani ham eng qadimiy insonlar maskani bo'lganligidan dalolat ekanligi biz uchun katta yutuq.

Kun tartibidagi masala muhokama etilib, O'zbekiston Respublikasining "Mahalliy davlat hokimiyati to'g'risida"gi Qonunining **6-moddasi** hamda "Madaniy meros obyektlarini muhofaza qilish va ulardan foydalanish to'g'risida"gi Qonunining **9-moddasiga** asosan Xalq deputatlari tuman Kengashi 25-sessiyasi

QAROR QILADI:

1. Viloyat madaniy meros boshqarmasining 2021-yil 23-fevraldagi 01-06/218-sonli hamda O'zbekiston Respublikasi Fanlar akademiyasi Milliy arxeologiya markazi Samarqand filiali Yahyo G'ulomov nomidagi Arxeologiya institutining 2021-yil 22-fevraldagi 17-sonli xatlari asos sifatida Xalq deputatlari Bulung'ur tuman Kengashidagi O'zMTDP deputatlik guruhi rahbari A.Shokirovning axboroti ma'lumot uchun qabul qilinsin.

2. Bulung'ur tumani "Bog'bon" MFY hududidagi "G'o'bdin" tog'i "Yetimsoy" darasida joylashgan qadimiy qoyatosh suratlari moddiy madaniy meros obyektlari davlat kadastrining yangilanadigan ro'yxatiga kiritish uchun tavsiya etilsin.

3. Samarqand viloyat Madaniy meros obyektlari boshqarmasidan Moddiy madaniy meros obyektlari ro'yxatiga Bulung'ur tumani "Bog'bon" MFY hududidagi "G'o'bdin" tog'i "Yetimsoy" darasida joylashgan 2 ta yirik tepalikni "Yetimsoy qoyatosh suratlari tizmasi" nomi bilan kiritish so'ralsin.

4. 2021-yilning 10-martiga qadar tuman yer tuzish va ko'chmas mulk kadastr tomonidan "Yetimsoy qoyatosh suratlari" obyektining kadastr hujjatlarini tayyorlanishi ta'minlansin.

5. Tuman hokimligi, Samarqand viloyat Madaniy meros obyektlari boshqarmasi bilan birgalikda "Yetimsoy qoyatosh suratlari tizmasi"ni qonun hujjatlariga asosan muhofaza qilinishi ta'minlasin.

6. Bulung'ur tumani "Bog'bon" MFY hududidagi "G'o'bdin" tog'i "Yetimsoy" darasida joylashgan 2 ta yirik tepalikka belgilangan namunadagi muhofaza belgisi o'rnatilsin.

7. Bulung'ur tuman hokimining o'rinbosari (A.Xalikulov)ga Bulung'ur tumani "Bog'bon" MFY hududidagi "G'o'bdin" tog'i "Yetimsoy" darasida turizmni rivojlantirish, ushbu hududga sayyohlarni jalb etish bo'yicha yo'l xaritasi ishlab chiqsin.

8. Tuman mahalliy budjet parametrlarini tasdiqlanishida moddiy madaniy va arxeologiya merosi ob'yektlari uchun alohida mablag'lar ajratilishi ko'zda tutilsin.

9. Mazkur qaror ijrosini ta'minlash tuman hokimining o'rinbosarlari (D.Xabibulayev, R.Xoljigitov, B.Ilchiyev) hamda Xalq deputatlari Bulung'ur tuman Kengashining Ijtimoiy-madaniy rivojlantirish masalalari bo'yicha doimiy komissiyasi (Sh.Axmedov)lar zimmasiga yuklansin.

Kengash raisi



B.Baxramov